

Акафист преподобному Силуану, подвижнику и старцу Русского Пантелеимонова монастыря на святой горе Афон

Кондак 1

Избранный подвижнике и земный ангеле Христов, всеблаженне отче Силуане! В непрестанном бдении, посте и смирении отцов афонских презрядный подражателю, жаждою по Бозе и горением любви к Нему благодать обильную душе твоей стяжал еси, всеблаженне. Христу подражая, за томящихся во аде, живых и грядущих молитвою слезною сраспинался еси. Сицевыя любви твоя не лиши и нас, во юдоли греховней твоего предстательства пред Богом просящих и умильно зовущих: Радуйся, отче Силуане, в молитве за мир горение любви неугасающее.

Икос 1

Ангелов Творец и Господь Сил из чрева матере твоя предызбрал ты, и, по глаголу Псалмопевца, сердце глубоко дарова ти, богоносне отче Силуане, да, яко в чертозе презряднем, вместиши невместимое имя Бога Вышняго, и силою Божию, и Божию Премудростию житию ангельскому всеусердно последуеши. Мы же, похваляюще чудный подвиг земных трудов твоих, благоговейно зовем ти: Радуйся, родителей благочестивых плод целомудренныя чистоты; радуйся, благовонное цветение их подвига веры, неувядаемыя красоты. Радуйся, благочестие родителей твоих душевне возлюбивый; радуйся, целомудрию и боголюбию их уподобитися благоволивый. Радуйся, измлада радости в Бозе искати дивно умудривыйся; радуйся, аки елень к источнику благодати Божия устремивыйся. Радуйся, словом Божиим, аки сладким медом, разум юности твоя усладивый; радуйся, сердце твое воле Божией всецело покоривый. Радуйся, отче Силуане, в молитве за мир горение любви неугасающее.

Кондак 2

Виде ты Препоблагословенная Богородица, в пучине греховней погружаема, егда сладость греховная, аки змий злосрадный, вниде во утробу юности твоя, Матерски печалующихся, дивно воззвати: чадо, прискорбно Ми есть видети ты во греховнем делании оскверняющася. Юже, состраждущу о твоём грехопадении уразумевав, змия греховного мужемудренно изринул еси, покаянием и молитвою того побеждая, любящему же нас Господу присно воспевая о Пречистой Матери Его благодарную песнь: Аллилуиа.

Икос 2

Разум Божественный осени тя, егда глас Матере Господа Сил услышати сподобился еси, избранниче Божий Силуане, и благодать Святаго Духа исполни сердце твое. Тоя же действием, аки серна из тенет, в вертоград дивно призвавша тя Божия Матере - Гору Афонскую, от мирския суеты устремился еси, во еже прилепиться Богу сынолюбне. Мы же, видяще чудное изволение о тебе мира Владычицы, умильно зовем ти: Радуйся, от мрака греховного к свету Истины Христовы Самою Пречистою призванный; радуйся, быти верным делателем Ея земнаго вертограда дивно избранный. Радуйся, земли Российския грозде сладкотечный, на Горе Афонстей изобильно произрастший; радуйся, совесте недремлющая, покаянною молитвою жало греховное притупившая. Радуйся, во Святей Пантелеимоновой обители ангельски Богу послуживый; радуйся, в труде, посте и безмолвии врага, борющаго тя, славно покоривый. Радуйся, вся козни диавола смиренномудренно поправый; радуйся, жажду по Бозе веру непорочную славне стяжавый. Радуйся, отче Силуане, в молитве за мир горение любви неугасающее.

Кондак 3

Сила Вышняго воистину храняше тя, егда дух ада и смерти претяше ти, и душу твою прельщеньми греховными обуреваше, боголюбиве отче Силуане. Изнемогай же, Бога неумолима помыслил еси быти, тогда Человеколюбец Господь, в неизреченном Фаворстем блистании, тя посети и огнем благодати Святаго Духа укрепи тя, всеблаженне. Ты же, аки Павел, новое рождение восприяв, со страхом и радостию зывал еси Богу: Аллилуиа.

Икос 3

Имея богатство благодати, Духом на Небеса возведен был сей и тамо неизреченныя глаголы слышал еси. Воистину радости тоя кто исповесть отче преблаженне Силуане. Егда бо, вне образов мира, в созерцании Божества, доброты несказанныя, безмерно любящего и всепрощающаго Христа Бога Лице видети сподобился еси, неизреченныя любве Божия преисполнился еси. Мы же, чудящися твоему неизглаголанному боговидению, вопием: Радуйся, в подвизе веры Христова посещения и утешения сподобивыйся; радуйся, тамо благодатными дарами Святаго Утешителя Духа преизобильно напоенный. Радуйся, причастниче неизреченныя райския красоты; радуйся, Богом возлюбленный и Им облагодатствованный щедротами Небесныя доброты. Радуйся, тоя благодати всему человеку роду прилежно ходатайствующий; радуйся, яко страж недремлющий, ко

утру жизни вечныя нас пробуждающий. Радуйся, отче Силуане, в молитве за мир горение любви неугасающее.

Кондак 4

Бурю лютых искушений воздвиже на тя человекоубийца диавол, искони ищущий праведных погубити, но ты, отче Силуане, Духом Святым наставляемый держати ум твой во аде и не отчаяватися, в непрестанном бдении и смирении козни диавола предваряя, того победил еси. Он же, тобою посрамленный, не обвинуяся, рече ти, яко лжец еси. Тако от сетей врага душу твою, аки голубицу кроткую, Бог соблюл еси, непрестанно воспевая Ему: Аллилуиа.

Икос 4

Слышаще о тебе, яко дивно от мирския суеты к иноческому подвигу призвана бывша и благодатию Божиею добр плод творяща, преподобне, не токмо младии иноцы, но и старцы в подвиге зело искуснии, к тебе притекаху, и аки медом, дела и словеса твоими услаждахуся и тако равноангельнаго жития достигающе, Господу подобяхуся. Мы же, видяще тя смиренномудрием украшена, с радостию зовем ти: Радуйся, смиренномудрия и целомудрия кладезю неисчерпаемый: радуйся, земнаго Едема крине благоуханный и неувядаемый. Радуйся, благое иго Христово в подвиге твоём с любовью носивый; радуйся, ум твой, сердце и волю в Бозе молитвою утвердивый. Радуйся, чистоты душевныя и телесныя хранителю усердный; радуйся, непрестанною молитвою на высоту безстрастия возшедый. Радуйся, святоотеческим правилам усерднейший подражателю; радуйся, Небеснаго Отечества и любви Божия к нам непрестающий глашатаю. Радуйся, отче Силуане, в молитве за мир горение любви неугасающее.

Кондак 5

Звезду, путь указующую и ум просвещающую, Божественную благодать дарова ти Господь, боголюбиве отче Силуане, и тою, аки пророка Илию у потока Хорафа, на спасительный подвиг укрепляше тя. Ты же, дивно питаемый от неизживаемых сокровищ Духа Святаго, в юности и престарении, от стражи утренния до нощи, в молитвах за всю вселенную, аки свирель сладкопесенная, непрестанно взывал еси Богу: Аллилуиа.

Икос 5

Видим тя, о преблаженне отче Силуане, в подвиге благом, аки младенец млека матери любви Божия ищуща и к Тому любовию пламенеюща, и слезно взывающа: помяну душа моя любовь

Господню, и согреться сердце мое: кто бо даст ми толикий жар, еже не знати ми покоя во дни, ниже в нощи от любви Божия? Сего ради содрогаемся сердцем, и умиляемся душою о толиком горении любви твоея ко Всещедрому Богу, и умильно зовем ти: Радуйся, паче сладка меда неутолимо правды Божия жаждущий; радуйся, в любви твоей ко Господу Ангелом подражающий. Радуйся, возносяй кадило молитвы чистыя, аки пламень огненный; радуйся, красотою ангельскаго благоговения украсивший горня и дольня. Радуйся, яко огню купины несгораемая сердце твое уподобляшеся; радуйся, яко руце твои, аки Моисеовы за народ избранный, за всех пред Господом простирашася. Радуйся, ты бо возлюбил еси возжелати судьбы Божии на всякое время и взыскал еси оправданий Его; радуйся, яко непрестанно Ему взывал еси: спаси, Боже, люди Твоя и благослови достояние Твое. Радуйся отче Силуане, в молитве за мир горение любви неугасающее.

Кондак 6

Проповедник немолчен безмолвия явился еси, угодниче Божий, егда Человеколюбец Господь восхоте в любви испытати тя и посещения Всесвятаго Духа лиши тя. Ты же, уразумевав себе лишена быти Того благодати, аки Адам, лишения рая рыдавый, сердцем сокрушенным слезно взывал еси: Господи! Ты прежде взыскал еси мя и дал ми еси насладитися Духом Твоим Святым, и душа моя возлюби Тя. Ныне же тужит душа моя по Тебе. Сице рыдая, обаче на милосердие Божие уповая, взывал еси Ему: Аллилуиа.

Икос 6

Возсиял еси, боголюбиве отче Силуане, яко новый тайновидец, отнелиже смирением и молитвою со слезами благодать Святаго Духа паки стяжал еси, от нея же любви неизреченныя преисполнися сердце твое. Ты же, уразумевав благодати сея силу, дерзновением Илииним воззвал еси: Господи! Не токмо мне, всему миру даруй познати любовь Твою и спастися! Мы же, имуще тя молитвенника пред Богом неусыпна, со умилением зовем ти: Радуйся, яко молитвенным сраспинанием за умерших, живых и грядущих был еси небо отверстое; радуйся, яко сицевою любовию исходатайствовал еси душе твоей Царство Небесное. Радуйся, чистоты веры и беззлобия дивное воплощение; радуйся, грехопадениям ближних твоих стяжавый Христово всепрощение. Радуйся, дивнаго святилища мира - угодников Божиих верный сподвижник; радуйся, Препоблагословенныя Игуменнии Афона верный послушник и даров Святаго Духа вместилище. Радуйся, Горы Афонския свирель сладкопесенная, о грядущей жизни возвещающая; радуйся, Тоя вертограда трудник неусыпный, в под-

виге изнемогающих укрепляющий. Радуйся, отче Силуане, в молитве за мир горение любви неугасающее.

Кондак 7

Хотя Человеколюбец Господь явити в тебе новое благосветное светило, преподобне отче Силуане, яко ветвь масличную, от корене земли Российския, в пустыни Афонстей насади, и Духа Святаго благодатию орошая, многоплодна ты сотвори: дела бо и словеса твоими, аки елеем животворным, чистоте и целомудрию, благочестию и братолюбием всех наставлял еси. Они же, союзом любви связуеми, покаяюще худшее лучшему, воспеваху Богу: Аллилуиа.

Икос 7

Новаго пустынножителем сподвижника, монахом и мирским наставника и учителя яви тя Господь, преблаженне Силуане. Ты бо, еще в мире жив, некоего воина о грехопадении жены своея соблазвившагося и во гневе ярящася, Христову всепрощению научил еси, и сим Таинство Брака - малая Церковь от разрушения сохранися: иноков же, в уныние впадших, к стяжанию душевного мира призывая и страху Божию наставляя, к покаянию приводил еси, и тако рая жителей быти всех приуготовлял еси. Ведуща ты тако о спасении всех печалющася, достождно с любовью вопием ти: Радуйся, пустыннолюбцев в искании Бога усердный сподвижнике; радуйся, братолюбия прилежный строителю и теплый о всех молитвеннике. Радуйся, на пути житейском, в бедах и напастех сопутнике верный; радуйся, в болезнях и печалех, и скорбех душевных служителю нелицемерный. Радуйся, вестнике любви Божия, к примирению с Богом и ближним своим всех призывающий; радуйся свидетельством, яко благ Господь, души от греха изнемогающия в надежде прощения подкрепляющий Радуйся, верный подвижнике земнаго Едема, спасения миру слезно ходатайствующий; радуйся, за всех нераскаянных грешников во ад снити желающий. Радуйся, отче Силуане, в молитве за мир горение любви неугасающее.

Кондак 8

Странное чудо яви тебе Господь, преблаженне отче Силуане, егда старца-духовника Авраамия, преображенна во образе Своем, невырази-мо сияюща, дивно ти показа и тако честне почитати Таинство Покаяния нас настави. Мы же, видяще тя, волю свою, яко Самому Господу, духовному отцу своему вверяюща, и тако смирением и покаянием злыя хотения своя отсекающа, воле Божией, чрез пастырей Церкви Христовы, научаемся вверитися, и сиче, прежде

исхода нашего, гнева Божия и Суда грядущаго избежать, вопиюще Тринединному Богу: Аллилуиа.

Икос 8

Всем сердцем и душою смирение Христово стяжавый, предивный угодниче Божий, и Тому, Возлюбленному, за мир сраспинайся, слезно взывал еси. Сладчайший Иисусе! Ты воскресил еси душу мою любити ближняго своего. Даруй ми убо источати слезы за всю вселенную, да вси людие познают Тя и да насладятся миром Твоим и узрят свет Лица Твоего. Мы же, во гресех житие наше иждившии и тобою спасаеми, ублажаем Тя сице: Радуйся, Заступницы Усердныя в молитвах за мир сподвижниче неумолимый; радуйся, яко Иеремия о народе плачущий, Гору Святую слезами оросивый. Радуйся, предивный афонский подвижниче, всю вселенную твою освящающий; радуйся, яко отец чадолюбивый, за всех, во гресех погибающих, слезно перед Богом ходатайствующий. Радуйся, Христу Богу возлюблене угодниче, Ангелам радость и удивление; радуйся, Севера светлое сияние, в Афонстей пустыни Святыя Руси чистое отображение. Радуйся, в смирении и послушании явивый миру образ ангельския красоты; радуйся, теплотою молитвы твоея и нас домом Духа Божественнаго хотяй сотворити. Радуйся, отче Силуане, в молитве за мир горение любве неугасающее.

Кондак 9

Все естество ангельское и подвижников множество удивившася смирению и человеколюбию твоему, отче наш Силуане, егда экономства послушание восприяв, целомудренному Иосифу во Египте уподобился еси. И не токмо о братии святыя обители, но и о мирских делателях, тамо трудившихся, яко о чадах Божиих, попечение имевый, Богу, любящему всякое Свое создание, о тех взывал еси: Господи, последи Духа Святаго Твоего и утеша скорбныя души бедных людей сих. Тако бо во всяком послушании смиренномудрия красоту показуя, непрестанно взывал еси Богу: Аллилуиа.

Икос 9

Ветии многовещании не возмогут изрещи силу любве твоея, предивне отче Силуане, ты бо слезно жаждал еси всяку вражду и нестроение в людех угасити и всяческая с Богом примирити, взывая Владыце мира: Господи! Твоим жажду быти и с Тобю за всю вселенную сораспяться, да вси спасени будут. К братии же взывал еси: чада, молитесь за врагов своих, они бо суть братия ваша - жизнь ваша, враг же мира токмо диавол есть. Мы же, тако к братолюбию и человеколюбию тобою наставляеми, зовем ти: Радуйся, добротою

твоею Христу на Голгофе уподобивыйся; радуйся, не руками бо, сердцем и душою за врагов своих сраспинавыйся. Радуйся, о ближних пекийся и красоту благодатного безмолвия неутративый; радуйся, любя ближних своих, силу непрестанна молитвы стяжавый. Радуйся, постом и молитвою стрелы лукаваго до конца отразивый: радуйся, злоловления и ухищрения диавола препобеждати нас научивый. Радуйся, в мельнице Христовой плоть трудом изнуряя, аки хлебом священным, сердце молитвою услаждавый: радуйся, делателей вертограда Царицы Небеснаго хлебом жизни изобильно питаваый. Радуйся, отче Силуане, в молитве за мир горение любве неугасающее.

Кондак 10

Спасения души твоя ища и Христу Сладчайшему прилепиться желая, от земли отец твоих на Гору Святую мирне притекл сей, идеже в воздержании и безмолвии, трудолюбии и человеколюбии равноангельную красоту стяжал еси, всеблаженне. И тако преблагословеннаго утра, егда вси пустыннолюбцы обителей Афонских полунощную песнь Творцу воспеваху, благия кончины достигл еси и душу твою, Животворящим Телом и Кровию Господнею напитанную, в Божественныя руки Того предал еси, во еже непрестанно со всеми святыми воспевати святых Святейшему слову: Аллилуиа.

Икос 10

Царя Небеснаго, Егоже славословят Херувими и Серафими и святых собори, житием, верою и любовию всеусерднейший служитель был еси, преподобне, и яко благоуханный, со всеми избранниками Пречистыя Богородицы, у Престола Всесвятыя Троицы предстал еси. Буде же, всеблаженне, о благоденственном мире земли отец твоих усердный пред Богом ходатай, о Церкви же Святей - ангел неусыпный молитвы и теплый предстатель, да тобою от бед избавляеми, благодарне зовем ти: Радуйся, ангеле земли Российския, на Святей Горе преизрядно потрудивыйся; радуйся, молитвенниче теплейший, у Престола Божия за нас любовию сраспеншийся. Радуйся, о людех земли отец твоих усердный перед Богом ходатаю; радуйся, братии афонскаго вертограда, в подвизе изнемогающих, скорый предстателю. Радуйся, язвы Господа твоего на теле твоем безропотно носивый; радуйся, душу твою, покаянными слезами убелену, чисту Тому вверивый. Радуйся, верный делателю винограда Христова, к Горнему Сиону Господем призванный; радуйся, яко тамо собеседуеши со святыми и Ангелы, славою и честью увенчанный. Радуйся, отче Силуане, в молитве за мир горение любве неугасающее.

Кондак 11

Песнь благохвальную приносим ти, угодниче Божий, отче Силуане, горением бо любви ко Господу, за спасение мира взалкавшему и смирением Своим диавола посрамившему, верно последуя, пустыню афонскую молитвою чистою облагоухал еси, образ равноангельного жития, многоплодными дарами Святаго Духа украшенный, благодатно нам показуя. Сице бо Гору Святую раевы уподобляя, врага посрамил еси, души же твоей Царствие Небесное стяжал еси, подвизая и нас любовь к Богу прилепятся, вопиюще Ему: Аллилуиа.

Икос 11

Светоподательнаго Света и благодати Святаго Духа носителя в житии и по смерти всему миру яви тя Господь во днех наших, преподобне, во еже взирающе на тя, нетленною красотою земных подвигов блистающа и херувимски у Престола Божия за нас молитвы творяща, в надежди спасения нашего уверимся и благонравному житию всеусерднейше последуем, волю же свою любви Божией сладко покорим, такожде и в телесех и душах наших прославление имене любящаго нас Господа да утвердится. Темже, тобою в вере укрепляеми, с любовью зовем ти: Радуйся, подвигом жизни благонравныя в любви к Богу нас укрепляющий; радуйся, усердный обличателю злонравия, Таинства и правила веры православныя хранити нас наставляющий. Радуйся, пусынножительством Петру Афонскому в посте и безмолвии прилежно ревновавый; радуйся, попечением о благонравии иночествующих авве Афанасию верно подражавый. Радуйся, новый светильниче веры, в дни наши верный путь к Богу указующий; радуйся, о неоскудении благодати Святаго Духа в Церкви Православней всем дивно свидетельствующий. Радуйся, верный рабе Христов, достойно у Престола Славы его предстоящий; радуйся, благия кончины и добраго ответа на Страшнем Судищи Христове нам усердно просящий. Радуйся, отче Силуане, в молитве за мир горение любви неугасающее.

Кондак 12

Благодати неисповедимую силу излия на тя Христос Бог наш, преподобне, во еже на Небесех, идеже все живет и движется в радости Духа Святаго, явити тя в лице афонских подвижников со всеми святыми о всех земнородных молитвы творяща. Тако ведуще тя, молимся: пролей о всеблаженне, теплую молитву ко Господу, да милосердовав, Церковь Свою Святую, во спасение наше, во веки утвердит, пустыннолюбцев земнаго Едема, всяко сохранит и укрепит, да во веки славословится имя Божие от земных и Небесных, поющих: Аллилуиа.

Икос 12

Поюще преславную память твоею, богоносне отче Силуане, достойно убожаем болезни и труды твоя, яже во бдении и пощении со всеми избранниками Божия Матере всеусердне понесл еси. Кто бо изочтет труды и воздыхания ваша, в молитвах за мир приносимыя, имиже Господь гнев Свой, грехов ради наших, на милование преложи и человеколюбием Своим клятву, еюже клялся - Церкви Святей до скончания века утвержденной быти не разори. Мы же, благодарни суще сицевому предстательству твоему, умильно зовем ти: Радуйся, водительство Святаго Духа усердный последователю; радуйся, Христа - Благодать и Премудрость Божию телесными очима лицезрителю. Радуйся, Христов смиренный подвижникче, Матери Божией пред всеми Небесными и земными радость и похваление: радуйся, неусыпный о мире молитвенникче, нашего спасения надежда и утешение. Радуйся, наследникче Царства Христова, подвигом своим Гору Афонскую украсивый; радуйся, нашего спасения верный сподвижникче путь, ведущий к Богу, нам освятивый. Радуйся, златокованная труба, со всеми святыми и Ангелами славу Божию возвещающая; радуйся, венцем бессмертия Богом увенчанный, в молитвах своих нас не оставляющий. Радуйся, отче Силуане, в молитве за мир горение любви неугасающее.

Кондак 13

О предивный угодникче Божий Силуане, земли Российския благодатное рождение, пустыннолюбцев Горы Афонския похвала и украшение! Приими от нас малое сие моление и испроси у Распеншагося за мир Христа Бога нашего, да помилует всех нас, чад Своих, и благодатию Святаго Духа в союз любве Своея свяжет нас, и имиже весть судьбами, к Себе приведет, во еже твоими молитвами непостыдно явитися нам в день Судный пред Лицем славы Его, и сподобитися со всеми святыми и Ангелы воспевати победную песнь: Аллилуиа.

(Этот кондак читается трижды, затем икос 1 и кондак 1)